

四庫全書

史部

欽定四庫全書

名臣碑傳琬琰之集中卷五

宋杜大珪編

王文正公曾墓誌銘

宋祁

景祐二年丞相右府缺上方圖任耆俊叅付魁極越二月制詔太原王公曾其上樞密使印綬還來相予進拜尚書右僕射門下侍郎所以命賜之尤渥公拜稽首讓弗遂於是擇典訓庸以熙百工外懷邇協以種九德銍味燮和辰階比平翼戴聖猷溥大光明迺十一月從欽

天柴昨沂以為公國他日請間伏青蒲上陳瘁苑嬰霜
露以陪願前此納政避賢人路帝憮然無開可意公執
不奪卒改左僕射加資政大學士鎮東平戊寅仲冬感
疹門子謁急書聞亟命將高手醫跳駢趨視不半道丙
午薨上推甲子得三百六十六復所生之辰家丞列治
讓還鴻臚典葬天子隱遺老之弗慙也再祈置朝殿左
貂以禔法贈備厚恩錄宗姻僚陪十人容官合文正二
言以謹周道公之喪來京師其引也蓋殯也邦人官師

沱涕相弔明年有司持丁亥詔書到公第仍舉中書令
密章以告愍冊焜煌再漏下泉本公之綢繆感會寵存
賁往有以致者其如仁歟其司直歟公字孝先由逸民
霸飛天漢顯基素德支裔屢徙今為青州益都著姓曾
祖諱鐸祖諱繼華皆臨道沉冥陰儲世烈考諱兼甘節
難進仕未及牘終著作佐郎深根浚源叢沛來祉公貴
推澤並贈開府儀同三司尚書令中書令爵皆為公大
王父國於越配國於魯妣曰張別贈燕夫人曰何為魯

夫人公即何夫人之子軒渠卓異魯公曰是大吾門八
歲終二喪斬焉致毀仲父宗元育之過所生一情以均
公亦以所愛事仲父如父甫冠與士鄉游汎博書記不
為章句儒諸老先生皆折輩行以交咸平中偕郡上計
委符入關策進士再為天下第一當此時二篇賦學者
爭傳都紙為貴以王佐期之初命將作監丞通治濟陽
代還試政事堂以大著作直太史服五品判三司戶部
案轉右正言知制誥服三品充史館修撰入翰林為學

士自司計外郎再遷至中兵拜諫議大夫叅議大政加
給事中以禮部侍郎守應天大名兩府復貳鼎席兼太
子賓客由左戶再遷至春官卿以內書侍郎執宰相筆
陟東臺兼地官遂躋上衮閱五歲琳宮火一昔焚冊灾
異免以天官為本州又易天雄軍即拜彰德軍節度使
檢校太尉稍換天平軍檢校太師俄同中書門下平章
事徙判河南府入冠樞極罷幢綵還冢宰他如故公由
布衣起君門譽處時行為龍光景式凡三十七年別任

九判大理尚書都省登聞檢知審刑審官禮儀院通進
銀臺司門下封駁事莅三班院糾察在京刑獄領使五
持金絮遺湟水首為生辰使輦謁譙祠為考制度使館
寓神嶽以中台為會靈觀使高真寶符以元輔為玉清
昭應宮使再見上帝為南郊大禮使主工部一由集賢
殿昭文館及西清之祕為大學士三監脩國史一階一
品勲十二轉表功十有四字食虛邑萬有二千五百室
實五千一百室此踐揚隆赫其大較也初契丹盜遼濟

為褫服最近早符晏檄悉財賦佐軍興公由倖事疏一
二便宜數奏蒙可衆器其能天僖夜妖自三川相靡而
東公守睢陽不逞謹恐里閭畫闔公闢牙門分吏曉捕
先倡者鞭梏之妖息不復南築雉都城周萬雉雲睥言
言宸居以尊復陝路轉粟二十萬饑得無乏歲旱蝗齊
楚周十八以上民曹逃貸困粟鄉縣株送結強盜抵死
公一切榜遣流瘠更生以千計所至立學宮分租奉助
興作五州鑿金石以頌魏人畫像事之課治者以公為

尤綠圖夜闕度宮以儀曲密礮石庀材規創萬楹公列
五害願省損制度奉承大中之意先帝弗豫太子已決
事或議長秋臨政儉人甚語翕翕公時訓護儲邸謂后
姻倖曰太子長秋誼不獨立有如兩宮相維社稷安矣
后悟由是內外恭順無違言莊獻總軍國儀鑾峙立佞
黨投罅廷議放肆公獨引東漢故事朝則帝在左太后
在右施簾自彰群臣奏事於前詔如公請長樂上徽冊
供張天安殿中公執不可改御文德差損宸坐志在強

王室安外家使無纖芥納忠者以公為盡大理總天下
獄異時為冗帝欲重之公自西臺被選評廷訊讞許自
辟丞屬遂踵為故事法家有違制而情不一公請非親
被以失論會具獄須報公据前比帝曰自是無復有違
制邪公曰如陛下言亦無復有失者帝悅更從輕坐語
材者器公之果踐內外辭禁贊為名命渾灝炳純倬古
同風或選為昌言或永為賡歌則家集合五十六篇詳
矣上始鄉學公采聖君賢臣事繪解為三十篇因以勸

成美德詔鏤於槩徧賜邇臣其他纂次尤多尚不錄言
文者歸公之治嗚呼惟公侃然正崖然立周密靖慎久
而無流心在上前開陳處可辯博有餘言國家用至日
旰出沐燕私訖不道省中語天資方重每廣朝大會盛
服玉色郎謁者視進止如有尺寸未嘗過缺雖妄庸人
嗤歷詆亦不能加半言毀短於公當國七年萬物茂宜
四夷休寧稼於原兵仆於鄙嘉生回薄無有恫怨務
大體若丙吉清淨如曹參總領衆職如魏相內文明如

鄧禹于時被公之化察察者敦沾沾者愧建啓露門祕
禁召惇儒碩老侍撻勸講復諫署舊員使正辭審議日
興於朝進賢不植私愛士不謀黨退不肖不奸怨奉羣
母孝與諸弟友親族可任言之上不可任厚分之財姻婭
進用皆以嫌自退上嘗大署忠亮忠厚四字錫之蓋實
錄云天下稱為賢公乾興天聖之際時多故矣身荷重
任為國休戚雖叅和傳會權定大爭殯彼怒牙沆其他
腸庇焉如忤懔慮焉如著蔡然至閑居獨念猶感慨以

之是必彌綸之才軋於羣媚而未悉獲騁健粹之氣有所難屈而弗慊於心煩慮焚如且至大病斯可慟已先時大星辰落郡寢上左右驚白公曰後一月乃自知之如期而始悟寧傳箕蕭昂有馮以始亦有以終邪君子謂為知命公始合姓於蔡實處士光濟之女又合姓於李故相文靖公之女卒繼室以其妹芳猷淑則迭映中壺后夫人獨偕公老故啓許國享脂田焉晝哭未期又不幸以褕衣而復母弟曰皞字子融為刑部郎中直集

賢院曰閔字孝德終國子博士子四人曰綢緣緯續綢
止光祿寺丞緣天閔續止將作監丞緯為光祿寺丞緯
之幼公取皞子繹以嗣及終又命之故繹即喪序今志
大理寺丞祕閣校理三女二早世一適屯田郎中沈維
溫公之捐館門下生與宗家計咸曰大墓無穆位不可
以葬乃改卜於滎陽惟新鄭吉又筮於臨洧鄉惟梁原
吉先是蔡夫人之歿已祔於姑歲在單閼冬十月乙酉
子融與繹等竭誠信舉公及二夫人之喪合窆新阡順

也子融雖受公蔭然自以材畧奮迨公時已翔冊府操
計籌糾都獄藉藉為聞人而孔懷為位之哀連歲摧潰
既奔走歲事且求狀於太子中允直集賢院富弼又自
裒公行事一篇合前後贊書見授而為之誌恭惟令君
之德在生人其憲度在臺閣其言在謨命其履踐在圖
書其人與不可傳者皆士矣今所撫次姑舉縉紳所道
者著於篇而納之壙中以慰蓼莪之思以謹高岸之變
噫繹也緯也既收而食矣尚不隕厥問而世其家云銘

曰

斤斤令君 揭來山東 利見國光 叅偶時龍

既奮厥庸 遂為宗工 訂平津之封兮

上初纂嗣 毋違叅治 揭日當天 實相以濟

讒脣不搖 王室無恙 賴陳平之智兮

五藩于宜 既仁且賢 邦民宜之 厥猷茂焉

乃建將牙 乃示台躔 翳吉甫之憲兮

鄭圃聯圻 泉塗啟扉 刻章美楨 終天此依

九京千載 食仰餘微 惟隨武之歸兮

胡太傅宿墓誌銘

歐陽修

太子少師致仕贈太子太傅胡公諱宿字武平其先豫章人也後徙常州之晉陵世有隱德為晉陵著姓公舉進士中天聖二年乙科為真州揚子尉縣大水漂溺居民令不得救公曰拯溺無職也即率公私舟活數千人歲滿調廬州合肥主簿張丞相士遜稱其才公學問該博兼通陰陽五行天人災異之說南京鴻慶宮災公以

為南京聖宋所以受命建號而大火主於商丘國家秉德而王者也今不領於祠官而比年數災宜修火祀事下太常歲以長吏奉祠商丘自公始慶歷六年夏河北河東京東同時地震而登萊尤甚公以歲推之曰明年丁亥歲之刑德皆在北宮陰生于子而極于亥然陰猶強而未即伏陽猶微而未即勝此所以震也是謂龍戰之會而其位在乾今西北二敵中國之陰也宜為之備不然必有內盜起於河朔明年王則以貝州叛公又以

為登萊視京師為東北易艮少陽之位也今二州並置
金坑多聚民以鑿山谷陽氣損泄故陰乘而動縣官入
金歲幾何小利而大害可即禁止以寧地道皇祐五年
正月會靈宮災是歲冬至祀天南郊以三聖並配明年
大旱公曰五行火禮也去歲火而今又旱其應在禮此
殆郊丘並配之失也即建言並配非古宜用造配如初
詔其後并州議建軍為節鎮公以星土考之曰昔高辛
氏之二子不相能也堯遷閼伯於商丘主火而商為宋

星遷實沈於臺駘主水而參為晉星國家受命始於商丘王以火德又京師當宋之分野而并為晉地參商仇讎之星今欲崇晉非國之利也自宋興平僭偽并最後服太宗削之不使列於方鎮八十年矣謂宜如舊制公在翰林十年多所補益大抵不為苟且而妄隨故其言或用或不用或後卒如其言然天子察公之忠欲大用者久矣嘉祐六年八月拜公諫議大夫樞密副使公既慎靜而當大任尤顧惜大體而羣臣方建利害多更張

庶事以草弊公獨厭之曰變法古人之難不務守祖宗成法而徒紛紛無益於治也又以為契丹與中國通好六十餘年自古未有也善禦外侮者謹為備而已今三邊武備多弛牧馬著虛名於籍可乘而戰者百無一二又謂滄州宜分為一路以禦敵此今急務也若其界上交侵小故乃城寨主吏之職朝廷宜守祖宗之約不宜爭小利而隳大信深戒邊臣生事以為功在位六年其論議類皆如此文行薦諸朝召試學士院為館閣校勘

與修北史改集賢校理通判宣州三遷太常博士判吏部南曹賜緋衣銀魚知湖州為政有惠愛築石塘百里捍水患大興學校學者盛於東南自湖學始公丁母夫人憂去而州人思之名其塘曰胡公塘學者為公立生祠於學中至今祀之公居喪毀瘠過禮三年不居于內服除為三司鹽鐵判官轉尚書祠部員外郎判度支勾院知蘇州兩浙路轉運使召還修起居注以本官知制誥兼勾當三班院已而兼判吏部流內銓入內都都知

楊懷敏坐衛士夜盜入禁中驚乘輿斥出為和州都監
懷敏用事既久勢動中外未幾召復故職公封還詞頭
不草制論曰衛士之變蹤跡連懷敏得不窮治誅死幸
矣宜宜復在左右其命遂止久之拜公翰林侍讀學士
遷翰林學士兼史館修撰判館事兼端明殿學士累遷
尚書左司郎中兼知通進銀臺司審刑院羣牧使提舉
在京諸司庫務醴泉宮判尚書禮部遂判都省再知禮
部貢舉奉使契丹館伴北朝人使亦皆再而虜人嚴憚

之公為人清儉謹默內剛外和羣居笑語諠譁獨正容
色溫溫不動聲氣與人言必思而後對故其莅官臨事
慎重不輒發發亦不可回止而其趣要歸於仁厚朝議
在官年七十而不致仕者有司以時按籍舉行公以謂
養廉恥厚風俗宜有漸而欲一切以吏議從事殆非所
以優老勸功之意當少緩其事使人得自言而全其美
節朝廷嘉其言是至今行之皇祐新樂成議者多異論
有詔新樂用於常祀朝會而郊廟仍用舊樂公言書稱

同律而今舊樂高新樂下相去一律難並用而新樂未施於郊廟先用之朝會非先王薦上帝配祖考之意皆不可近制禮部四歲一貢士議者患之請為間歲議已定公獨以為不然曰使士子廢業而奔走無寧歲不如復用三歲之制也衆皆以公言為非行之數年士子果以為不便而卒用三歲之制仁宗久未有皇子羣臣多以皇嗣為言未省公以學士當作青辭禱祀於山川即建言儲位久虛非所以居安而慮危願擇宗室之賢者

立之以慰天下之心語甚切至英宗即位拜給事中治
平三年累上表乞致仕未允久之拜尚書吏部侍郎觀
文殿學士知杭州為政不畧細故或謂大臣不宜自勞
公曰此民事也吾不敢忽以是民尤愛之明年今上即
位遷左丞五月公以疾告遂除太子少師致仕命未至
而以六月某日薨於正寢享年七十有三即以某年某
日葬於某州某縣某鄉之某原公之曾祖諱持累贈大
傅曾祖妣某氏追封某夫人祖某累贈某官祖妣某氏

封某郡太夫人父諱某累贈太師兼中書令妣某氏追封某夫人公累階光祿大夫勲上柱國開國安定爵公食邑二千八百戶食實封四百戶賜推誠保德翊戴功臣初娶吳氏追封蘭陵郡夫人再娶何氏封南康郡夫人子男五人長曰宗堯今為都官員外郎次曰遵路早卒次曰宗質國子博士次曰宗炎著作佐郎次曰宗厚早卒女四人皆適士族孫若干人公自為進士知名於時楊文公億得其詩題於祕閣歎曰吾恨未識此人其

舉進士也謝陽夏公絳薦公為第一公名以此益彰而
謝公亦以此自負少嘗善一浮圖其人將死謂公曰我
有祕術能化瓦石為黃金子其葬我我以此報子公曰
爾之後事吾敢不勉祕術非吾欲也浮圖歎曰子之志
未可量也其篤行自勵至於貴顯常如布衣時有文集
四十一卷銘曰

允兮胡公 順外剛中 惟初暨終 一德之恭
公之燕居 其氣溫溫 舉必可法 思而後言

公在朝廷 正色侃侃 蔚有嘉話 憂深慮遠

不迎利趨 不畏勢反 有或不從 後或如之

多而愈信 孰不公思 侍從之親 樞機之密

名望三朝 清職峻秩 愷悌之仁 宜國黃耆

七十而止 孰云多壽 惟善在人 刻銘不朽

王文正公曾碑陰
宋祁

故丞相沂國公既葬十二年仲弟天章閣待制子融請
間見上追歎公據正有守得宰相體子融頓首謝且言

臣兄曾事章聖皇帝興諸生不十年參摠大政其後拜
玉几下聞顧命大行詔章獻皇后權軍國大事於時宰
相謂

丁謂也

陰開邪謀規刊權文營罔中外衆莫敢抗獨

臣兄毅然不肯移又欲建白天子朝朔望太后聽政附
中人通裁可即又引東漢故事請帝太后同視事偽計
不行方謂譖逐大臣如寇準李迪等鈎索株連以動衆
心臣兄中立其間為國督視隱匿慶情卒不得施遂用
詐敗太后再受徽號欲御天安殿復奏言止御文德殿

既忤旨因災異策免然太后以數救諫不能無念抑畏
謙慈勤翊王家大業以安此其事陛下尤彰明較著者
上曰乃舅之勲予一人不忘子融再拜曰陛下幸詔臣
察勒詞隧石誠得天筆篆額敷賁前人死骨不朽勸罷
忠門由臣為初制曰可乃署旌賢碑三字賜焉於是天
章君即金石刻又欲侈上之褒丐辭序其來僕念已嘗
誌丞相墓且翰林銘功其事大畧著矣獨原夫天子念
丞相賢而旌之者寧不以臨大事不可奪歟損益過舉

以絕未萌而為之所歟功格於天默不自名歟僕嘗論
治亂之機不容髮如令丞相當是時一有假借則紀律
約更權迫勢陵儉人乘之抵巇投隙意有所肆淪胥淫
夷遂蹈後艱凡列爵幾何底罰幾何而後能定由是觀
之丞相之勲可以言者其大也夫陰施之所及廣則陽
德之報蒙顯故丞相雖賢待聖人乃明初公於天章敦
愛甚而天章奉公也無不至始丞相未貴時娶蔡李二
夫人早亡及貴謙不封國天章歲比當遷輒上書還一

官為二夫人追封成公志也至是又引甲令建螭首龜
趺丞相之名由天章益傳春秋之法於善善也長至刻
祭奠銘樂樂皆所以行遠况珉表之隱然天文之燦然
披九幽之潛光奮無窮之休烈後雖千百歲拜餘風泣
遺直者曰此賢丞相之隴歟嗚呼盛哉

名臣碑傳琬琰之集中卷五

欽定四庫全書

名臣碑傳琬琰之集中卷六

宋杜大珪編

龐莊敏公籍墓誌銘

司馬光

公諱籍字醇之其先出於周之畢公因邑命氏近世自
鄆徙居單之武城曾祖考諱某贈太師中書令妣何氏
封越國夫人祖考諱某贈太師中書令兼尚書令妣某
氏封秦國太夫人考諱某贈太師兼中書令妣某氏封
魏國太夫人自秦公以往仍世不仕魏公始以通春秋

仕至國子博士公幼敏達工文辭書無不觀舉進士上第釋褐黃州司理叅軍秩滿居魏公憂服除調江州判官未之官用舉者除開封府兵曹叅軍諸兄欲分魏公遺產公曰吾幸有祿盡以讓二兄一錢不取知府事薛公奎素名威嚴少許可獨具公而器之待遇甚厚謂曰公他日必致公輔余不及也仍舉之法曹頃之為大理寺丞知襄邑縣召還編天聖敕授刑部詳覆官會群牧判官缺是時章獻太后臨朝用中旨求之者以十數執

政患之謀曰得孤寒中有聲望才節可以服人者與之
則中旨可塞矣乃以公名進太后果從之仍改服銀緋
久之出知秀州事明道中召入為殿中侍御史章獻太
后崩章惠太后欲踵之臨朝公奏燔閣門所掌垂簾儀
科以沮其謀當時服其敢言先帝始專萬機富於春秋
左右欲以其巧自媚後苑珠玉之工頗盛於前日公上
言今螽螟為災民憂轉死北有耶律西有拓跋陛下安
得不以儉約為師奢靡為戒重惜國用以徇民之急上

深納其言中丞孔公道輔嘗謂人曰今之御史多承望
要人風旨陰為之用獨龐公天子御史耳欲授開封府
判官尚美人方有寵遣宦者稱教旨免工人市繇公上
言祖宗以來未有美人敢稱教旨干撓府政者上怒杖
宦者切責美人仍詔諸官府自今有傳宮中之命者皆
無得施行龍圖閣學士范諷喜放曠不遵禮法士大夫
多慕效之又為姦利事公乃屢劾奏其狀不報會除祠
部員外郎廣南東路轉運使將之官復奏言之且曰苟

不懲治則敗亂風俗將如西晉之季不可不察有詔置
獄以覈其實獄成諷坐貶鄂州行軍司馬仍下詔戒天
下風俗上欲還公御史而以貶逐大臣之故亦以公為
太常博士知臨江軍至官未百日復授祠部員外郎福
建路轉運使景祐三年以侍御史召還執政奏擬戶部
判官上曰龐某止可三司判官耶後九日除刑部員外
郎兼侍御史知雜事改服金紫尋判大理寺糾察在京
刑獄知審官院在臺中二年執政奏擬戶部刺史上曰

龐某宣得以常塗進之遂擢為天章閣待制拓跋元昊
僭亂陝右騷動公奉使體量安撫還未幾出知汝州事
數月徙知同州事尋授陝右都轉運使慶歷元年延安
缺帥以公為龍圖閣直學士知延州事尋加鄜延路馬
部軍都部署經畧安撫緣邊招討等使明年除延州觀
察使五辭不受復遷諫議大夫職任如故延安自五龍
川之敗戎落民居焚掠幾盡距郭無幾悉為寇境人心
危懼公至補綻茹陋聚用增備撫民以仁馭軍以嚴戍

兵近十萬未有壁壘多寄止民家無秋毫敢犯民者諸將欲出兵公召問方畧取其所長而誨其所短告以賞罰已而必行由是諸將莫敢不盡力出輒有功是時元昊數犯邊覆軍殺將而獨不近鄜延間或小入輒以敗去故地為虜所據者公悉逐之築十一城於險要其腹中可食之田盡募民耕之延安遂為樂土會朝廷益厭兵欲赦元昊之罪以詔書命公招懷之公曰虜驍勝方驕若中國自遣人說之彼益偃蹇不可與言先是元昊

用事之臣伊瑀旺榮遣其牙校李文貴來公留之於邊至是召之自從公所諭以逆順禍福遣還文貴尋以旺榮曹偶四人書來用敵國修好之禮公以其不遜未敢復書請於朝朝廷急於息民命公復之書開延而勿拒稱旺榮等為太尉且曰元昊果肯稱臣雖仍其僭名可也公上言僭名禮不可容臣不敢奉詔太尉天子上公非陪臣所得稱今方抑止其僭而稱其臣下為公恐虜滋驕不可得臣旺榮等與臣書自稱謨寧令謨寧令此

虜中之官中國不能知其義可以無嫌臣輒從而稱之
朝廷善之旺榮等又請用小國事大國之禮公曰此非
邊帥所敢知也而主若遣使者奉表以來乃敢導導致
於朝廷耳是時朝廷方修復涇源公恐虜猝犯之敗其
功乃留連其使數與之講議雖抑止其僭亦不決然絕
也如是踰年元昊乃遣其伊州刺史賀從朮來自稱男
邦面令國烏珠曩霄上書父大宋皇帝公使謂之曰天
子至尊荆王叔父也尤奉表稱臣今名體未正不敢以

聞從勗曰子事父猶臣事君也使從勗至京師而天子不許請更歸議之公上言虜自背叛以來雖屢戰得氣然喪和市之利民甚愁困今其辭禮稍順必誠有効事中國之心願聽從勗詣闕更選使者往至其國以詔旨抑之彼必稱臣凡名稱禮數及求匄之物當力加裁損必不得已乃少許之若所求不違恐豺狼之心未易盈厭也朝廷皆從其策元昊果稱臣冊命為夏國主上以西鄙之寧皆公之功乃密詔諭以兩府有關當補之四

年遂入為樞密副使公在延州治州城及諸寨皆募禁
軍為之軍行出塞則使因糧於敵馬芻皆自刈之還界
其直民無飛輓之勞及去民遮道泣曰公用兵數年未
嘗以一事煩民雖以一子為香焚之猶不足報也追送
數驛乃去公居樞府上言陝西用兵以來用度太廣請
遣使者減省邊費上從之所省逾半八年叅知政事皇
祐元年以工部侍郎為樞密使公以近世養兵之弊在
於多而不精故國用困竭與丞相合議大加簡閱於是

中外言者鼎沸以為必生大變上亦疑焉公曰萬一有一夫狂訴臣請以百口償之卒行其策是歲凡省八萬餘人三司糧賜皆有餘矣三年同中書門下平章事又兼昭文館大學士公為相專以公忠便家國為事不以官爵養私交取聲譽端明殿學士程公戡知益州將行上俾公諭之戡還當處以兩府公曰茲事出於上恩臣不敢預聞卒不與程言廣源蠻儂智高反毒徧嶺南王師數不利詔以樞密院副使狄青為宣撫使以討之言

事者以青武人不足專任固請以侍從之臣為之副上
以訪公公曰屬者王師所以屢敗皆由大將權輕偏裨
人人自用遇敵或進或退力不能制故也今青起於行
伍若以侍從之臣副之彼視青如無也青之號令復不
可得行是循覆車之軌青素名善戰今以二府將大兵
討賊若又不勝不惟嶺南非陛下之有荆湖江南皆可
憂矣禍難之起未見其涯不可不慎青在廊廷居臣麾
下沉勇有智畧若專以智高委之使青先以威齊衆而

後用之必能辦賊幸陛下勿以為憂也上曰善於是詔
嶺南用兵皆受青節制處置民事則與樞密直學士孫
沔等議之青至嶺南斬敗軍將校數人進擊智高於邕
州大敗之智高奔大理捷書至上喜謂公曰嶺南非卿
執議之堅不能平今日皆卿功也青還上欲以為樞密
使同平章事公曰昔曹彬平江南太祖謂之曰朕欲以
卿為師相然今外敵尚多卿為使相安肯為朕盡死力
耶賜錢二億而已今青雖有功未若彬之大若賞以此

官則富貴極矣異日復有寇盜青更立功將以何官賞之且青起軍中致位二府衆論紛然以為國朝未有此比今幸而立功論者方息若又賞之太過是復使青得罪於衆人也臣所言非徒為國體亦為青謀也爭之累日上乃許之加青檢校官遷護國軍節度使河中尹仍賜其諸子官既而内外官訟青功以為賞薄者多上重於違衆復以青為樞密使其後青卒以官盛為世所疑近世臺官進用太速公舉舊制御史秩滿以大藩處之内侍省

都知任守忠侍上久求領節度使上以問公公曰自宋興以來未有內臣為節度使者陛下至孝凡祭祀文物事有毫髮關於宗廟者未嘗不兢兢畏懼況祖宗典法又可隳耶上乃止由是內外怨疾頗多會道士趙清貺與公有瓜葛親與堂吏通謀受人賂詐許為之求官公聞之奏捕清貺及堂吏繫獄窮治其姦杖而流之清貺行數日而斃於是言事者乘此爭詆毀公協力排之始以為公私於清貺未言殺以滅口上雖知公無罪欲厭言

者之心五年命以戶部侍郎知鄆州事兼京西東路安撫使既而深悔之是歲上親祀南郊前月餘謂執政曰龐某可就加觀文殿大學士速行之若過大禮是與有罪者無以異也及詔出仍厚加賜賚契丹來求上御容及例外事數條上以問執政皆相視莫能對上悵然久之曰前者出龐某太忽忽蓋以公習知邊事能斷大事故也至和二年除昭德軍節度使永興軍路安撫使知永興事未行又改河東路經畧安撫使知并州事嘉祐

元年上得疾久未瘳中外憂懼公上言比者陛下皇子繼天宮坊虛位立嗣之義禮有明文願陛下深思祖宗統緒之重歷選宗室宜為嗣者速決聖意制命一出則羣心大安奉承宗廟之孝無大於此臣以寒儒荷陛下大恩位至將相是以冒重禍而不疑不悔年垂七十遍於休退固無他望唯陛下保萬世之業懷生蒙無窮之幸乃老臣之大願後數年上遂定大策如公議麟州屈野水西有田與夏虜相接疆場不明數十年來虜盜耕

之麟人不能正也至是詔邊吏禁止之邊吏頗暴掠其
民公曰拓跋氏稱臣奉貢未失臣禮今不先以文告而
遽暴掠之使歸曲而責直非中國所以禦外侮也乃戒邊吏
謹斥候毋得輒犯虜徐以義理曉之虜不去召使更定
疆場又不至公曰虜仰吾和市如嬰兒之待乳若絕之
虜必自來乃禁邊吏無與虜為市虜大窮移書於邊請
遣使更議疆場使者至有曰會管勾麟府軍馬事郭恩
恃其勇果與知麟州事武賤走馬承受公事黃道元率

兵不滿千人涉屈野水西至忽理堆不為戰備虜怨邊
吏之累其民每聚兵萬餘於境上以待邊吏至而擊之
以復其仇邊吏守公約束虜以饑疲罷去者數矣至是
或告虜在水西恩等不信虜遂發伏兵以擊恩等恩道
元皆沒於虜戡脫走得歸然虜以和市故猶遣使者來
請退水西之田二十里公不許先是公命通判并州事
司馬光之麟州與戡議邊事戡請東虜罷兵之時築二
堡於屈野之西以禁耕者且為州耳目某還以告公從

之比往而虜兵已復聚戢不敢興役及敗乃言其行視
堡地為虜所掩以至已失亡會虜遣道元歸朝廷命御
史按之御史新拜官欲排擊大臣以為名移幕府取文
書公以築堡之議某實與焉恐并獲罪乃留檄某之書
以其餘與之御史遂劾奏公擅築堡於邊以敗師徒又匿
制獄所取文書坐是解節鉞復以觀文殿大學士戶部
侍郎知青州事兼京東東路安撫使某慚忤守闕上書
具言其狀自請斧鉞之誅朝廷不許公又上奏引咎自

歸乞矜免某罪某卒不坐他日某見公無所自容而公待之如故終身不復言始公在并州甫七十亟欲告老會左遷不敢至青半歲乃上表自陳朝廷不許遷尚書左丞徙知定州兼本路安撫使公過京師入見上面陳至誠上曰新進之臣畏怯避事定州兵驕日久藉卿威名以鎮之卿勉為朝廷行也公不得已請讓還左丞及至定一年而歸老上許之如期復請詔召還京師公陳請不已或謂公今精力克壯年少所不及主上注意方

厚何遽引去若此之堅公曰必待筋力不支明主厭棄
然後乃去是不得已豈止足之謂耶凡上表者九手疏
二十餘通朝廷不能奪五年聽以太子太保致仕公好
學出於天性雖耄老家居常讀書賦詩未嘗閑用此自
娛至忘饑渴寒暑子弟雖愛之甚嘗莊色以誨之閨門
燕居人不見其有惰容其為治以愛民為主明練法令
以平心處之嘗曰凡為大臣尤宜祇畏繩墨豈得自恃
貴重亂天子法耶惟治軍差嚴有犯輒以便宜從事或

斷斬剗磔或累笞致斃軍中股栗然能察知其勞苦至於廬舍飲食無不盡心為之區處使皆完美故所至士卒望風聳畏而終無怨心遇僚屬謙恭和易有所關白苟可取雖文書已行立為更易無愛吝之心八年三月丙午以疾薨於第年七十六時上已不豫聞之震悼不能臨奠遣中使弔賻其家未踰月宮車晏駕今上在亮陰故未及贈謚公先娶夫人邊氏故樞密直學士肅之女封嘉興縣君再娶劉氏供備庫使永崇之女封彭國

夫人男五人長曰元魯登進士第官至大理寺丞早終次
元英太常博士次元常內殿崇班次元中大理寺丞次元
直大理評事女七人元英將以某年六月壬申葬公於雍
丘之東山乃謂光曰公生平知愛莫如子也子當銘公墓
某自知不文不敢辭噫某受公恩如此其大減身不足以
報然公之德烈載天下之耳目某不敢以一言私焉銘曰
顯允公德 柔嘉維則 敏而好謀 果而不惑
函谷以西 幼艾嬉遊 邊鄙不聳 荷公之休

五嶺以南

復為王土

制勝廟堂

永公之祐

文服武取

動皆有成

誰克知之

維天子明

天子爵祿

天子法度

怨憎孔多

公忠乃著

旅力未愆

辭榮以年

子衆而賢

受福之全

天之生公

以佐先帝

綴衣在庭

公適辭世

迹實為文

歟石幽泉

身毀名傳

垂之億年

高文莊公若訥墓誌銘

宋祁

至和二年秋八月甲寅觀文殿學士兼翰林侍讀學士

尚書左丞同羣牧制置使高公薨於京師之莫享年五十有九既聞上震悼趣輦降酹其寢既還明日罷紫宸朝出尚書右僕射制書告樞賙幣賻金係於庭太常考行謚曰文莊以冬十月己酉克葬公於開封府開封縣褒親鄉之原前此門人河東裴煜騰狀來中山取文誌隧予與公遊也舊誼不得讓哭寢門已次其梗概曰公諱若訥字敏之生十歲而孤侍母夫人客汲郡生事日狹取粗完即已惟縱嗜於學性警銳過目輒記自周漢

訖茲數千歲救草質文疊疊能言之天聖初以鄉貢牒
詣有司聲光闔焉一日出諸儒上方天子委禮部取士
於是中山劉公筠大褒英才得二百人多海內選公在
第四調彰德節度府推官改著作佐郎再遷太常博士
歷三縣以辦最稱臺御史薦為監察裏行就改主客員
外進殿中遷右司諫直史館起居舍人留知諫院換刑
部員外郎知御史雜事於是數見上言得失蜀賈援
外戚得郎官知蔡州公劾賤丈夫干沒財利不宜以私

謁汙二千石內侍省大中人怙恩聲焰震赫人爭媚附
公斤言其尤即日外遷有詔累黍定尺檢制樂律法不
合爭論連年公獨以漢世貨泉度寸定古尺示諸朝議
者服其密嘗言中書樞密院所與一統類美風俗今奏
事離立不改刻遽罷不能究熟萬機宜復古坐而論道
使人自竭帝聽其言擢天章閣待制益親近轉禮部郎
中出為河東都轉運使召還丁母夫人憂號訴願盡三
年國朝兩省內外制而上有故者卒哭輒奪哀有不獲

命慘袍襪到朝就職自公得請後遂著行服令詔給實奉終喪逮除盡還舊官拜龍圖閣直學士史館修撰以吏部郎中進諫議大夫權御史中丞慶厯七年春小旱上憂甚引公問洪範雨暘所以致休咎者公推原五事以對其議閎深博衍上嗟嘆之後三日引拜公樞密副使見便坐上戒以和公頓首言和無莫濟者有如樂焉音異乃諧若可否出一是同也同則生黨時大臣執議見迂故公謝及之由是見謂為長者天下無事常宿屯

三垂募兵不止度支財益屈公議一切停募料冗士以
蘇調給之殘詔可康定時西鄙騷繹東南多盜始置宣
毅兵州悉有之扞鎮方夏士既飽衣食不事悍不可制
公曰是本欲制賊今反自賊何賴為建擇精銳者團藉
北遷以補戍人守臣爭言士素驕驟遣必亂公固謂朝
家威令整嚴等輩孰敢既徙無一士干法以工部侍郎
叅知政事後二歲由戶部侍郎檢校太傅為樞密使儂
瓘襲邕州殺守將公曰南海可虞也或謂未然閱旬賊

剽十餘州乘流下番禺入其外郭南軍不習鬪部校爭
長連戰輒北賊遂張嘯亡命數萬嶺南大瘡公謂當遣
貴賢將節度諸部以蕃落千騎怖之可擒也會大臣馳
往斬敗將鼓而南賊盡銳薄前軍顧騎出其後驚以為
神遂大敗南事平帝議策勲公欲讓功臣使得其處即
辭位章五上拒不省公請愈牢帝重違又以公次當得
宰相雖解機務猶以學士籍留自近公喜曰天下士不
吾責已公節分崖然不與俗流至浮屠神仙陰陽怪譎

事弗語也在禁中論得失無少回撓及建白裁處皆深
自匿令出返從人問所以然故獻納之益初祕弗得詳
久乃知十一二常謂承平久吏忽事厯必峻法治之謂
管夷吾韓非責名實賞信罰必術最近與儒家相輔長
利可興云公之次行軍約束敕白罷內降封拜外戚不
可輔政皆著後法執官尹不建節謂具丘將屈賊自容
卒論死諫止數赦蓋畧施行所謂者輔政七年潔畏自
將和傳內外謀議有不盡如素或蘊諸內綽然有餘然

未嘗以不如素自解亦不以有餘矜諸人故仕雖貴忌者不媚已去位間者不容訾歿而士君子泣相弔也公善觀書反復研討必得其意乃置不誕漫莽鹵貯之胷中所學邃而該殆不可及所著文章二十卷善文辭者貴之公累官攝領難悉著掇其顯者待制時假節京西為安撫使在臺兼理檢使知貢舉再使契丹一知審刑院一領吏部銓三班院各再侍經筵二特召進讀者一爵開國公階光祿大夫勳上柱國邑二千八百實戶六


百功號自推忠佐理換推誠保德大較如此曾祖諱某
贈累太師祖諱某仕為崇儀使考某官右侍郎並贈太
師中書令兼尚書令考封祁國公曾妣王夫人祖妣馬
夫人妣夫人間啓魏晉秦三國為太夫人公娶太原王
氏封某國夫人生五男子曰彥輔東頭供奉官曰保衡
曰安石曰吉甫大理評事曰元規太常太祝四女子長
適太常博士游奎仲適都官員外林億叔適佐著作張
誼季適鎮江節度推官王宗詰孫五人尚幼噫子也令

女也淑夫人也仁而賢宜其承公孝謹是似而光大之初公在慶歷時葬二令君於開封縣之吹臺鄉地稍卑公恨之將改卜及是諸孤遷二令君柩與僕射同塋以昭穆為位公志也凡人見今世傑才卓行其於奔走嚮服尤未聞如古人之賢何歟不得見而愈貴也使千歲後視今為古予知有藉公風烈者長想太息恨不得操鞭彗從公後以快其意為果不疑銘曰

高氏自渤海徙占河東為榆次人世潛德弗融久乃發

祥建公大昌以孤童奉母羈旅京師軋出陋貧化為偉
人由御史諫官健健敷言事有固爭不市直取名我完
吾履弗援弗倚一辭寤主直都貴位憤俗陵遲令敝法
刵遂弛必衰或悼後艱自公佐王輔乾為剛不假借賞
刑以新故章引薦俊良惟力孜孜斯謀斯猷外莫聞知
澹於榮寵峻節是甘去位甚易如肩釋擔邇英之游惟
經術是毗巷無密輪輿無媵桂誰市其門誰侈而室聞
公之風可以自律初秦國多疾公自調治方劑天悟親

嚮壽祺公之屬疾自診不可召見諸子遺訓逾厲歿無
以私取丐諸天子天子賢之嗟我師臣顯卒先哀滂漏
厥恩予聞于古曰仁者壽公不六十斯言三究有家皋
如有樹岑如公安是居千載不渝



名臣碑傳琬琰之集中卷六

欽定四庫全書

史部

名臣碑傳琬琰之集中卷

七至十

詳校官檢討

臣羅國俊

刑部郎中

臣

許兆椿覆勘

總校官進士

臣繆琪

校對官中書

臣嵇承志

謄錄監生

臣劉耀馥

欽定四庫全書

名臣碑傳琬琰之集中卷七

宋杜大珪編

王待制質墓誌銘

范仲淹

孔子曰善人吾不得而見之矣噫先聖謂善人之難得也如此世有德之清行之方政之平斯不謂之善人乎余見之於子野王公矣公諱質字子野其先太原人曾高占籍大名皇考諱徹以文行顯至右拾遺累贈太師尚書令兼中書令魯國公王考諱祐雄文直道名重海

內掌太祖誥命至兵部侍郎累贈太師尚書令兼中書
令晉國公考諱旭以公正果敢屢當藩寄為時之良二
千石累贈兵部尚書妣虞氏贈某郡君公稟嚴君之教
幼而有文伯父文正公為真宗朝賢相重德大器人莫
可動一日覽公之業喜甚作詩以獎之謂吾門未衰矣
用文正陰補太常寺奉禮郎三遷至大理丞文正既薨
公年尚未冠進所著文真宗嘉之召試學士院辭入優
等賜進士及第聲動京師嘗師事楊文公文公器之每

謂朝中名公曰是子英妙加於人遠矣翰林劉公筠風
岸高峻縉紳仰望不得其門而進乃與諸公共薦公之
才敏天子命公校文於館中歷殿中省丞為博士於太
常加集賢校理拜祠部員外郎丁兵部憂服除以前官
充職同判姑蘇郡以公心公言正二千石之政二千石
初不平之終服其義而加禮焉還朝賜五品服章改度
支外郎同判尚書刑部又判吏部南曹進司封外郎出
領淮西郡部中十邑素多盜與訟號為難治公至斷獄

必以情按吏必有禮橫者繩之弱者扶之州人大服謂
往之使君莫公若也蔡俗舊祠吳元濟公曰豈有逆醜
而當廟食耶吾為州長不能正民之視聽俾民何從哉
狄梁公李太尉皆唐之忠烈又德加蔡人胡為不祠命
工徹元濟廟建二公之祠率吏民拜祭蔡人從之于今
號為雙廟秩滿拜祠部郎中朝廷除公開封府推官除
兄雍三司判官公曰是皆要職吾兄弟同日除拜朝廷
豈乏人哉乃堅請外補留兄京師以奉家廟士大夫聞

而賢之往守壽春郡幾月改合肥郡盜有殺其徒以并其財者吏擒之公令處死法寺議當貸死遂劾之公上疏曰盜以彊力而又殺人吏追而擒之自非露而悛者胡為而貸焉如法寺所論能害其類者皆無罪名民將競為盜盜已而殺一夫其黨咸赦之盜可止乎疏上不報凡斷獄出入以下吏為首長官為從公曰吾不勝法吏矣上言請為之首朝廷從之左降監舒州靈仙觀後一年令資政殿學士昌黎韓公琦知審刑院議盜長其徒

非自首而悛惡者宜勿原之朝廷始頒示天下且知公
前所斷獄不為失矣今資政殿學士鄭公戩翰林學士
葉公清臣皆論公奇才未大用而非辜坐黜豈朝廷之
意耶詔起公知海陵郡代還除度支郎中荆湖北路轉
運使時西郵宿兵財用為重諸道轉運使競進羨餘幾
千萬斬助軍之獎實瘡痍細民以為已績公至而歎曰
西兵天子不得已而用之然須於財賦豈如是而迫耶
吾不當為由是荆湖之民賴公少休焉會資政殿學士

富公弼拜職尚帶史館修撰與公未嘗識面聞公風義
舉公以代修撰朝廷從而除之兼掌選事及韓富二公
在樞府又交薦公清方為縉紳之冠天子俞其奏擢以
本官充天章閣待制依前掌選事公再讓不允既而客
有扣公曰銓衡至重利病多矣公無建明者何公曰紀
綱盡在如權衡然但持者輒高下其手爾何必易其器
耶公居之歲時選士賴其平其間人物清濁公必辯之
上前量有進抑振天官久墜之職也天子以西北數藩

鎮皆須巨人乃擇近列而褒遣之公得領陝州州當四達之會又用兵而來吏民疲苦公至則緩征賦薄迎勞屏凶寇拯孤弱人迺息肩幾一載而感疾以慶厯五年七月二十六日終於黃堂享年四十五靈柩歸東都州人哭送於道朝廷加賁賻焉公生相門而弗驕弗華以貧為寶文正作舍人時家甚虛嘗貸人金以贍昆弟過期不入輟所乘馬以償之公因閱家藏書而得其券召家人示之曰此前人清風吾輩當奉而不墜宜秘藏之

又得顏公為尚書乞米於李大夫墨帖刻石以摹之遍
遺親友間其雅尚如此故終身不貪所至有水蘂聲此
公之秉德不亦清乎公充職館殿二十餘年同舍皆顯
官公介然不動惟求外補當國者非戚必舊公未嘗折
顏色屈語論以合其意嘗有交遊以言事被謫朝之貴
人皆切齒公特率昆弟祖宴都門謫者拒之曰無為子
之累乎公曰吾願為黨人從而貶之光矣此公之執行
不亦方乎公為數郡皆清心以思治行已以率下必首

崇學校而風化之有犯法非害于物者必緩其獄未始深文焉求民之疾雖處幽不遺去民之梗雖負勢不避此仁人之政不亦平乎故每去一州則百姓號慟如赤子之慕慈母也公性純孝與家人道先君事必感激泣下故厚於宗族每拳拳焉憂樂同之弟素文正之子也自淮南外計改涇原經略使公食不甘寢不安曰弟有母老且疾吾無親憂因入對請代行使既而弗許命其愛子規曰彼窮塞也得無危事汝可侍行而左右之以均

吾憂又少弟端嘗不利於春官處徒勞者久之公為郎
以歲課當遷願移厥恩召端一試朝廷許之賜端進士
出身其友愛之心有如此者公不治生業惟蓄書僅萬
卷遠近從之兼通佛老微旨撰寶元摠錄一百卷皆聖
賢窮理盡性之說公樂稱人之善必曰吾不及矣在士
大夫非風義高遠弗與之遊及其逝矣四方交友書問
弔云前年吳安道死今年王子野卒賢士大夫之清者
何其衰歟公娶周氏禮部侍郎起之女封褒信縣君生

子男三人曰恣將作監主簿曰規前明州奉化縣主簿
曰復太廟室長女二人長適太常寺太祝范純仁次女
尚幼余走塵土時公一接如舊以道義淡交者有年矣
結二姓之好以親仁人余嘗期公以青雲之器大有立
於國朝今不幸乃為公之墓銘銘曰

嗚呼人之清者曰賢國得而治焉性之仁者曰壽民得
以庇焉何子野之善人兮逝矣如川惟清方而平正兮
居人之先在聲詩之有言兮胡不萬年恣送之於死兮

葬之於泉徒切切於辭兮勒石之堅期于野之令名兮
與白日而長然

孫待制甫墓誌銘

歐陽修

公諱甫字之翰許州陽翟人也初舉進士天聖五年得
同學究出身為蔡州汝陽縣主簿八年再舉進士及第
為華州觀察推官轉運使李紘薦其材遷大理寺丞知
絳州翼城縣故丞相杜祁公與紘皆以清節自高尤難
於取士聞公紘所薦也數招致之一見大喜已而祁公

自御史中丞拜樞密直學士知永興軍辟公司錄凡事之繁猥者一以委之公歎曰待我以此可以去矣祁公為謝顧事非他吏不能者不敢煩公公乃從容為陳當世之務所以緩急先後設施之宜又多薦士之賢而在下者於是祁公自以為得益友歲滿知彭州永昌縣監益州交子務再遷太常博士祁公為樞密副使薦於朝得祕閣校理是時諸將兵討靈夏久無功天下騷動盜賊數入州縣殺吏卒吏多失職而民弊矣天子方銳意更

用二三大臣乃極選一時知名士增置諫員使補闕失
公以右正言居諫院上好納諫諍未嘗罪言者而至言
宮禁事他人猶須委曲開諷而公獨曰所謂后者正嫡
也其餘皆猶婢爾貴賤有等用物不宜過僭自古寵女
色初不制而後不能制者其禍不可悔上曰用物在有
司吾恨不知爾公曰世謂諫臣耳目官所以達不知也
若所謂前世女禍者載在書史陛下可自知也上深嘉
納之保州兵變前有告者大臣不時發之公因力言樞

密副使當得罪使乃杜祁公也邊將劉滬城水洛於渭
州部署尹洙以滬違節度將誅之大臣稍主洙議公以
渭洛通秦渭於國家利滬不可

闕

滬洙

公平生所善者也公在諫院所言補益尤多是三者其
一人所難言其二人所難處者其後言宰相以某事當
去者上亟為罷之因以陳執中為叅知政事公又言執
中不可用由是上難之公遂求解職於是小人不便大
臣執政而朋黨之論起二三公相繼去位公亦在論中

而辯爭愈切不自疑由是罷諫職以右司諫知鄧州徙知安州歷江南兩浙轉運使再遷兵部員外郎改直史館知陝府又徙晉州河東轉運使公素羸性澹然寡所好欲恂恂似不能言而內勁果遇事精明議者謂公道德文學宜在朝廷備顧問而錢穀刀筆非其職然公處之益辦至臨疑獄滯訟常立得其情大賊張海郭貌山攻劫商鄧新破南陽順安公安輯有方常曰教民知戰古法也乃親閱縣弓手教之擊射坐作皆為精兵盜賊

為息陝當東西衝吏苦厨傳而前為守者顧毀譽不能有所損至公痛裁節之過客畏其清初無所望而亦莫之毀也陝人賴以紓後遂以為法其為轉運使所至州縣視其職事修廢察其民樂否以此陞黜官吏而不納毀譽遇下雖嚴而不害其在兩浙范文正公守杭州以大臣或便宜行事公曰范公貴臣也我屈於此則不得伸於彼矣由是一切繩以法而常以監司自處范公遇公無倦色及退而不能無恨公遇范公不少下然退而

未嘗不稱其賢也自河東召為度支副使勤其職不以
為勞已而得疾嘉祐元年遷刑部郎中天章閣待制河
北郡轉運使不行疾少間乃留侍讀公博學強記尤喜
言唐事能詳其君臣行事本末以推見當時治亂每為
人說如其身履其間而聽者曉然如目見故學者以為
終歲讀史不如一日聞公論也所著唐史記七十五卷
論議閱贍書未及成以嘉祐二年正月戊戌卒于家享
年六十公既卒詔取其書藏于祕府贈右諫議大夫又

有文集七卷公喜接士務揚人善所得俸廩多所施與
撫諸孤兒教育如已子曾祖諱恕博州堂邑主簿祖諱
賁尚書庫部員外郎考諱從革不仕以公貴累贈都官
郎中母曰長安縣太君李氏娶程氏壽昌縣君子三人
長曰宜滑州節度推官次曰寔曰寔皆將作監主簿女
三人一適將作監主簿程著餘皆早亡以五年七月丁
酉葬公於陽翟縣舊學鄉塢頭村之北原銘曰

惟學而知方以行其義惟簡而無欲以遂其剛力雖弱

兮志則強積之厚兮發也光仁宜壽兮奄以藏有深其
原兮有崇其岡永安其固兮百世無傷

書墓誌後

司馬光

明道中公在華州某始以太廟齋郎得謁見皇祐中辛
與公具在館閣公於某為前輩而某服公才仰公德不
敢以同舍期也然粗能熟公之為人元豐二年十一月
公弟子崇信令察示某以歐陽公所撰公墓誌某讀之
恍然如復見公得侍坐於旁也昔蔡伯喈嘗言吾為碑

銘多矣皆有慚德唯郭有道無愧色耳觀歐陽公此文其言公自初仕以美才清德為時所重在諫院言官禁事切直無所避在陝不飾厨傳凡當官公論不私其所愛淡然寡所好外和而內勁喜言唐事學者謂終歲讀史不如一日聞公論此皆某親所覩聞當時士大夫所共知可謂實錄而無愧矣公名高於世歐陽公以文雄天下固不待某言而後人信之然歲月益久識公者益寡竊懼後之人見歐陽公之文以為如世俗之銘誌但

飾虛美以取悅其子孫耳故冒進越之罪嗣書其末譬
猶捧土以培泰山掬水以沃大河彼豈賴此以為高深
哉蓋志在有以益之不自知其非任也

名臣碑傳琬琰之集中卷七

欽定四庫全書

名臣碑傳琬琰之集中卷八

宋杜大珪編

王文安公亮臣墓誌銘

歐陽修

公姓王氏其先太原祁人其六世祖某為唐輝州刺史
遭世亂因留家碭山碭山近宋其後又徙宋州之虞城
今為應天虞城人也公諱堯臣字伯庸天聖五年舉進
士第一為將作監丞通判湖州召試以著作佐郎直集
賢院知光州歲大饑羣盜發民倉廩吏法當死公曰此

饑民求食爾荒政之所卹也乃請以減死論其後遂以著令至今用之丁父憂服除為三司度支判官再遷右司諫郭皇后廢居瑤華宮有疾上頗哀憐之方后廢時宦者閻文應有力及后疾文應又主監醫后且卒議者疑文應有姦謀公請付其事御史考按虛實以釋天下之疑事雖不行然自文應用事無敢指言者後文應卒以恣橫斥死后猶在殯有司以歲正月用故事張燈公言郭氏幸得蒙厚恩復位號乃天子后也張燈可廢上遽

為之罷景祐四年以本官知制誥服金紫同知通進銀
臺司兼門下封駁提舉諸司庫務遷翰林學士知審官
院元昊反西邊用兵以公為陝西體量安撫使公視四
路山川險易還言某路宜益兵若干某路賊所不攻某
路宜急為備至於諸將材能長短盡識之薦其可用者
二十餘人後皆為名將是時邊兵新敗於好水任福等
戰死今韓丞相坐主帥失律奪招討副使知秦州范文
正公亦以移書元昊不先聞奪招討副使知耀州公因

言此兩人天下之選也其忠義智勇名動夷狄不宜以小故置之且任福由違節度以致敗尤不可深責主將由是忤宰相意并其他議格不行明年賊入涇原戰定川殺大將葛懷敏乃公指言為備處由是始以公言為可信而前所格議悉見施行因復遣公安撫涇原路公曰陛下復用韓琦范仲淹幸甚然將不中御兵法也願許公便宜從事上以為然因言諸路都部署可罷經略副使以重將權而偏將見招討使以軍禮置德順軍於

籠竿城廢涇原等五州營田以其地募弓箭手其所更置尤多方公使還行至涇州而德勝寨兵迫其將姚貴閉城叛公止道左解裝為榜射城中以招貴且發近兵討之初吏白曰公奉使且還歸報天子爾貴叛非公事也公曰貴土豪也頗得士心然初非叛者今不乘其未定速招降後必生事為朝廷患貴果出降明年四月以學士權三司使自朝廷理元昊罪軍興而用益廣前為三司者皆厚賦暴斂甚者借內藏率富人出錢下至果

菜皆加稅而用益不足公始受命則曰今國與民皆弊矣在陛下任臣者如何由是天子一聽公所為公乃推見財利出入盈縮曰此本也彼末也計其緩急先後而去其蠹弊之有根穴者斥其妄計小利之害大體者然後一為條目使就法度罷副使判官不可用者十五人更薦用材且賢者期年民不加賦而用足明年以其餘償內藏所借者數百萬又明年其餘而積於有司者數千萬而所在流庸稍復其業公曰臣之術止於是矣且

臣母老願解煩劇天子多公功以為翰林學士承旨兼
端明殿學士羣牧使初宦者張永和方用事請收民房
錢十之三以佐國事下三司永和陰遣人以利動公公
執以為不可度支副使林澠附永和議不已公奏罷澠
乃止益利夔三路轉運使皆請增民鹽井課歲可為錢
十餘萬公亦以為不可而權倖因緣多見裁抑京師數
為飛語及上之左右往往讒其短者上一切不問而公
為之亦自若也及公既罷上慰勞之公頓首謝曰非臣

之能惟陛下信用臣爾丁母憂去職服除復為學士羣
牧使再遷給事中皇祐三年以本官為樞密副使公持
法守正遂以身任天下事凡宗室宦官醫師樂公嬖習
之賤莫不闕樞密而濫恩倖請隨其事可損損之可絕
絕之至其大者則皆著為定令由是小人益怨構為飛
書以害公公得書自請曰臣恐不能勝衆怨願得罷去
上愈知公為忠為下令購為書者甚急公益感勵在位
六年廢職修舉皆有條理樞密使狄青以軍功起行伍

居大位而士卒多屬目往往造作言語以相扇動人情
以為疑而青色頗自得公嘗以語衆折青為陳禍福言
古將帥起微賤至富貴而不能保首領者可以為鑒戒
青稍沮畏嘉祐元年三月拜戶部侍郎叅知政事三年
遷吏部侍郎八月某日以疾薨于位享年五十有六公
在政事論議有所不同必反復切劘至於是而後止不
為獨見在上前所陳天下利害甚多至施行之亦未嘗
自名其所設施與在樞密時特異豈政事者丞相府也

其體自宜如是耶公為人純質雖貴顯不忘儉約與其弟純臣相友愛世稱孝悌者言王氏遇人一以誠意無所矯飾善知人多所稱薦士為時名臣者甚衆有文集若干卷將終口授其弟純臣遺奏以宗廟至重儲嗣未立為憂天子愍然臨其喪輟視朝一日贈左僕射太常諡曰文安曾祖諱某某官贈太傅妣某氏某國太夫人祖諱某某官父諱某某官皆贈太師中書令兼尚書令祖妣某氏某國太夫人妣某氏某國太夫人娶丁氏

安康郡夫人子男三人同老大理評事周老太常寺太
祝早卒朋老大理評事二女長適校書郎戚師道早卒
次未嫁王氏自遷虞城由公曾祖而下或葬雙金或葬
土山皆在虞城嘉祐某年某月某日改葬公之皇考于
某縣某鄉某原而以公從葬焉銘曰

王為祁人 遭亂不還 六世之祖 初留碭山
其後再遷 虞宋之間 遂安其居 葬不遠卜
宋多名家 王實大族 族大而振 自公顯聞

公初奮躬以學以文逢國多事有勞有勤
利歸于邦怨不避身帝識其忠謂堪予弼
俾副樞機出入惟密遂叅政事實有謀謨
誰中止之不俾相予帝有褒章愍錫之贈
長于百寮考德惟稱維古載功在其廟器
今亦有銘幽宮是閼

吳正肅公育墓誌銘

歐陽修

嘉祐四年某月某甲子資政殿大學士金紫光祿大夫

尚書左丞知河南府兼西京留守司上柱國渤海郡開國公食邑二千八百戶食實封八百戶賜紫金魚袋贈吏部尚書諡曰正肅吳公葬于鄭州新鄭之某鄉某原吳氏世為建安人自曾高以來皆葬建州之蒲城至公始葬其皇考于新鄭公諱育字春卿為人明敏勁果彊學博辯能自持度不可守不發已發莫能屈奪天聖中與其弟京方俱舉進士試禮部為第一遂中甲科而京方皆及第當是時吳氏兄弟名聞天下公初以大理評

事知臨安諸暨二縣遷本寺丞知襄城縣舉賢良方正
直言極諫策入三等遷著作佐郎直集賢院通判蕪州
同知太常禮院三司戶部度支二判官知諫院修起居
注知制誥判太常大理二寺吏部流內銓史館修撰累
遷起居舍人為翰林學士久之遷禮部郎中以學士知
開封府公為政簡嚴所至民樂其不擾去雖久愈思之
初秦悼王葬汝州界中其後子孫當從葬者與其歲時
上冢者不絕故宗室宦官嘗往來為州縣患公在襄城

每裁折之宗室宦官怒或夜半叩縣門索牛駕車以動之公輒不應及旦徐告曰牛不可得也由是宗室宦官曰此不可為也凡過其縣者不敢以鷹犬犯民田至他境矣然後縱獵其治開封尤先豪猾曰吾何有以及斯人去其為害者而已居數日發大姦吏一流于嶺外一府股栗又得鉅盜積贓萬九千緡獄具而輒再變衆疑以為冤天子為遣他吏按之卒伏法由是京師肅清方元昊叛河西契丹亦乘間隲盟朝廷多故公數言事

獻計畫自元昊初遣使上書有不順語朝廷亟命將出師而群臣爭言豎子即可誅滅獨公以謂元昊雖名蕃臣而實夷狄其服叛荒忽不常宜示以不足責外置之且其已僭名號謗其人勢必不能自削以取羞種落第可因之賜號若國主者且故事也彼得其欲宜不肯妄動然時方銳意於必討故皆以公言為不然其後師久無功而元昊亦歸過自新天子為除其罪卒以為夏國主由是議者始悔不用公言而虛獎中國公在開封數

以職事辨爭或有不得則輒請引去天子惜之慶歷五年正月以為諫議大夫樞密副使三月拜叅知政事與賈丞相爭事上前上之左右與殿中人皆恐色變公論辯不已既而曰臣所爭者職也顧力不能勝矣願罷臣職不敢爭上顧公直乃復以為樞密副使居歲餘大旱賈丞相罷去御史中丞高若納用洪範言大臣廷爭為不肅故雨不時若因并罷公以給事中知許州又知蔡州州故多盜公按令為民立伍保而簡其法民便安之

盜賊為息京師有告妖賊千人聚確山者上遣中貴人馳至蔡以名捕者十人使者欲得兵自往取之公曰使者欲藉兵立威欲得妖人以還報也使者曰欲得妖人爾公曰吾在此雖不敏然聚千人于境內安得不知使信有之今以兵往是趣其為亂也此不過鄉人相聚為佛事以利錢財爾一弓手召之可致也乃館使者日與之飲酒而密遣人召十人者皆至送京師告者果伏辜拜資政殿學士徙知河南府遷禮部侍郎徙永興軍

丁父憂去官起復懇請終喪服除加拜翰林侍讀學士
且召之公辭以疾上惻然遣使者存問賜以名藥遂以
知洪州居久之又辭以疾即以為集賢殿學士判西京
留守司御史臺疾少間復知陝府加拜資政殿大學士
自公罷去上數為大臣言吳某剛正可用每召之輒以
疾不至於是召還始侍講禁中判通進銀臺司尚書都省
明年拜宣徽南院使鄜延路經略安撫使判延州龐丞
相經略河東與夏人爭麟州界亟築柵於白草公以謂

約不先定而亟城必生事遽以利害牒河東移書龐公
且奏疏論之皆不報已而夏人果犯邊殺驍將郭恩而
龐丞相與其將校十數人皆以此得罪麟府遂警既而
公復以疾辭不任邊事且求解宣徽使乃復以為資政
殿大學士尚書左丞知河中府遂徙河南公前在河南
踰月而去河南人思之聞其復來皆驩呼逆于路惟恐
後其卒也皆聚哭公享年五十有五以嘉祐三年四月
十五日卒於位曾祖諱進忠贈太師妣陳氏吳國太夫

人祖諱諒贈中書令妣葛氏越國太夫人父諱待問官
至禮部侍郎贈太保妣李氏楚國太夫人娶王氏太原
郡夫人子男十人安度安矩安素皆太常寺太祝安常
大理評事安正安本安序皆秘書省正字安厚太常寺
奉禮郎安憲安節未仕女三人長適集賢校理韓宗彥
次適著作佐郎龐元英皆早卒次適光祿寺丞任逸公在
二府時太保公以列卿奉朝請父子在廷士大夫以為
榮而公蹶踏不安自言子班父前非所以示人以法顧

不敢以人子私亂朝廷之制願得罷去不聽天子數推恩郡臣子弟公每先及宗族疏遠者至公之卒子孫未官者七人有文集若干卷尤長於論議銘曰

顯允吳公 有家于閩 自我皇考 卜茲新原

厚壤深泉 樂其寬簡 今公其從 公志之安

公昔尚少 始來京師 挾其二季 名發聲馳

乃賜之策 以承帝問 語驚于廷 有偉其論

乃登侍從 乃任大臣 出入險夷 周旋屈伸

公所策事 先其利害 初有不從 後無不悔

公於臨政 簡以便人 人失而思 愈久彌新

帝曰廷臣 汝剛而直 來汝予用 斷余不惑

公曰臣愚 負薪之憂 帝為咨嗟 公其少休

優以大邦 寵其秩祿 尚冀公來 公卒不復

史臣考德 作銘幽宅

名臣碑傳琬琰之集中卷八

欽定四庫全書

名臣碑傳琬琰之集中卷九

宋杜大珪編

張翰林錫墓誌銘

歐陽修

翰林侍讀學士朝散大夫右諫議大夫上柱國清河縣伯張公諱錫字貺之其先京兆長安人也其祖山甫從唐僖宗入蜀留不返蜀遭王孟再亂絕于中國中國更五代天下為宋而蜀平張氏留蜀蓋亦已五世矣始得去為漢陽人又二世而張氏遂以大顯公為人清方敏

默為善不倦而喜自晦斂若不欲人知其遇人怡怡若無所不可及視其發施於事者其義有可畏其守有不可奪其能有不可及既已則若未嘗有所為者少喜讀書至其疾革猶不釋手自經史子集百家之說無不記覽通達而絕口不道於人故其晚始侍讀于中上嘗歎曰自吾得張錫日益有所聞以飛白為博學二字賜之曰錫老矣恨得之晚也公初舉進士中大中祥符元年甲科試秘書省校書郎知南昌縣萍鄉令改著作佐郎

又知安遠縣徙知新州興學校以教新人新人有進士
自公始再遷太常博士監染院詔選能吏治畿縣公以
選知東明前為令者闔門重簾以壅隔廢治公至則闢
門去簾告其人曰吾所治者三而已彊恃力富恃貲刑
恃贖者吾所先也其人以謂公言簡必信法簡必嚴於
是豪勢者屈善弱者伸縣以大治工部侍郎李及薦公
材堪御史上曰李及清慎人未嘗妄有所舉此可信也
乃以為監察御史故相丁謂貶崖州至是議徙內地公

疏言謂姦邪弄國罪當死無可憐且大臣竄逐本與天下棄之今復內還是違天下意由是止徙道州玉清昭應宮灾坐火事劾當死者百餘人公疏言天灾可畏不可反以罪人而重天怒願益修德以塞譴人乃獲免公於御史自監察歷殿中侍御史侍御史知雜事於尚書為員外郎郎中累官至諫議大夫於外為荆湖北路京東河北轉運使江淮南兩浙荆湖發運制置使利夔路安撫使知河中府滑州於三司為監鐵判官判勾院歷

鹽鐵度支戶部副使又嘗權知諫院判三班審官院太
常寺國子監於侍從為天章待制龍圖閣直學士翰林
侍讀學士雖其自晦其所居人皆以為宜其在京東籍
淄青齊濮濟鄆六州之人冒耕河壩地收稅緡絹歲二
十八萬而六州之民爭訟遂息其後言利者請稅天下
橋渡以佐軍公建言津梁利人而反稅之以為害卒爭
罷之平居退讓未嘗肯為人先妖賊王則反貝州兵圍
久不克而自河以北軍餉調發益急轉運使受命者以

疾留不行公自滑州權河北轉運使命至即日馳城下
軍須皆如其期其於取舍緩急常如此公居家有常法
雖貴顯衣服飲食如少賤時事母至孝與族兄甚相友
愛人以為同產公以皇祐元年七月某日遇疾卒於京
師享年六十有八上聞震悼以白金三百兩賜其家特
贈工部侍郎曾祖諱惟序不仕祖諱文翼復州錄事叅
軍贈太子中舍父諱龜從贈右諫議大夫母南陽郡太
君鄧氏自皇祖中舍君家于漢陽遂葬之至公始葬汝

州之襄城某鄉某原公初娶程氏再娶孫氏封樂安郡
君先公五十日而卒公子五人曰子駿子充子雲子諒
子真子充皆早卒於公之葬也子駿子雲皆為大理評
事子諒大理寺丞有孫十人女三人長適虞部員外郎
杜樞次早卒幼適大理寺丞王緯銘曰

自足乎其中不求乎其外斯惟公之善晦仁能勇於必
為善有應而無遠故公晦其終顯難於自進以晚見嗟
而壽胡不俾其遐嗚呼其奈何

賈翰林黯墓誌銘

王珪

治平二年十月戊子翰林侍讀學士長樂賈君卒於京師先是君病且革天子遣使挾太醫日夜臨視之君卒不能起贈尚書禮部侍郎又賜黃金其家明年正月辛酉葬于鄧州穰縣冠軍里將葬其孤士彥以君功狀來求刻文而納于墓中太原王珪為之序成都范鎮為之銘序曰按賈氏其先周康王時唐叔少子公明封于賈遂以為氏其後始顯于漢魏之間而望出長樂者世最

大君諱黥字直孺世居真定之獲鹿自君之曾祖始徙于鄧今為穰下人君少警悟方七八歲時人見其所作詩而驚偉之慶歷六年中進士第為天下第一除將作監丞通判襄州事代還召試學士院拜著作郎直集賢院判尚書刑部祀明堂覃恩遷右正言君年少方進用遇事感慨數上言朝廷仁宗識君手書常嗟賞之御史中丞王舉正留百官班將以事見上尚書郎杜樞獨出班問所以留班狀久之貶樞監稅衡州蓋樞嘗駁開封

府張彥方獄而事連權貴人人皆知以此得罪也而莫敢言君為力言之其後諫官御史皆爭事上前不能止因詔臺諫官自今須繇閣門自中書俟旨然後得上殿君又言曰羣臣獨得與上論事惟諫官御史爾今既不得時見上萬一有非常上何由得聞邪固請如舊制彰化軍節度使狄青為樞密副使君以謂祖宗定天下而立勲勞者多武臣然未嘗得與議惟幄者今承平之日久而驟用青行伍中使四夷聞之以為朝廷臣無如青

必有輕中國之心又宿衛諸軍見青尊寵若此皆傾心
歸之此尤不可不察遷三司判官同修起居注奉使契
丹還遷右司諫至和元年擢知制誥權判吏部流內銓
益州推官乘澤在蜀三年不知其父死及代還銓吏不為
領文書澤始去發喪既服除且求磨勘君言澤與其父
不通問者三年借緋匿喪是豈為孝乎卒使坐廢田里
晉州推官李亢嘗入粟得官後以罪引去它日應舉及
第當改官始自言其嘗以罪去也君曰士之罔冒其罪

可置乎遂奏罷之福州推官劉抃在銓俟引對而自以
曉星氣挾此以游公卿之門君乃奏以為靈臺郎於是
士人之知術數者不敢以自名君初修起居注見天子退
朝御邇英咨訪治道而史官不得與聞至是因請修起
居注入與經筵遂為定制嘉祐元年君以父春秋高請
知陳州尋改許州明年遷尚書兵部員外郎徙襄州屬
父思歸南陽既至家而疾篤君亦自移疾委郡事佐官
而去即日上書自劾臺諫官以君輒去郡為言降知郢

州已而離父憂服除君以前嘗謫郡不敢入朝詔趣還之勾當三班院明年召入翰林為學士判昭文館以疾復請郡乃除翰林侍讀學士戶部郎中知鄧州未行復以為翰林學士知審官院先是朝廷以京朝官每三歲輒自言求遷官非所以敦養廉讓也於是詔當遷者有司為舉行之而朝士之近名者輒或辭磨勘至數移督之不得止君以謂鄉者使其自言而士之不求進者宜有以旌異之今無復自陳之嫌則士大夫何以辭不願

磨勘也是亦矯妄之人徼取恬退之譽陰圖進擢之望
皆無益風化且考課之法豈特以歲月遷亦將稽其殿
而黜之請凡辭磨勘者有司不復督中書為籍記之其
後雖甚久皆毋得輒遷朝廷從君言於是偽辭磨勘者
不復至矣七年遷左司郎中知開封府君御下方嚴所
至人莫不憚之府吏舊七百人而諸嘗以罪去而復叙
者皆籍外補之蓋嘗數百人公乃奏為條其得復叙者
須俟籍中闕乃稍補之又府吏之給事它官者更七次

則一遷於是它官之請者歲不可勝數至有一事累請而為兩役者君又奏為條以其從事之所難者始得為次數餘悉罷之於是府吏取君所決十餘事緣飾而唱言之御史亦以是繩君仁宗見執政問賈某所為私乎對曰無有私也然而言者不已遂易君同提舉在京諸司庫務今天子即位遷中書舍人詔撰仁宗實錄更羣牧使治平二年拜給事中權御史中丞充理檢使上方親政事數進見具言無所避上嘗謂君曰朕欲用人而

未識其可者對曰天下豈嘗乏人耶在陛下所用爾乃陳任人之法五事一曰知人之明二曰養育以漸三曰材不求備四曰以類薦舉五曰擇取自代天子嘉納之是時選尚德寧公主君言曰國朝公主下嫁皆以祖為父以父為兄非所以正人倫之道也願詔諸公主下嫁如唐故事令盡其見舅姑之禮有司議濮王稱皇伯而不名朝廷下其議三省君勸上從有司議未報八月京師大雨水君時已寢疾復兩上疏以為簡宗廟逆天時

則水不潤下濮王議宜以時蚤決以塞天變踰月君疾未已願罷御史中丞乃除翰林侍讀學士知陳州纔數日而卒享年四十四曾祖延隱太子右監門率府副率祖昭遜內殿崇班閣門祗候父汶著作佐郎致仕贈少府監母陳氏繼母史氏陳初歸其宗父戒君它日能自顯則往迎之君卒迎陳母歸封仁壽郡太君史封唐安郡太君凡四娶馬氏任氏周氏皆蚤亡最後娶薛氏今封延安郡君二男子長元素蚤亡次上彥太常寺太祝

五女子君所著文集三十卷尤長於議論云銘曰

世言直孺舉進士第一不十餘年踐兩禁為得志而不知直孺之事兩朝開陳補益如此嗚呼使天假之年盡其所蘊則其澤之施於天下可勝既耶

名臣碑傳琬琰之集中卷九